

Ruth Harms a ricibi decoracion di Embahador Hulandes na Washington

ORANJESTAD - Dia 26 di april cuater di e 11 personanan cu mester a ricibi condecoracion di Orde van Oranje-Nassau for di Gobernador Refunjol no por tabata presente. Un di esunnan cu no tabata presente, tabata Ruth Harms, yiu di Clyde Harms, Fundado y Presidente Emeritus di Aruba Scholarship Foundation. Ruth ta e Case Management Supervisor di e organizacion Big Brothers Big Sisters di Hampshire County, Massachusetts.

Siman pasa riba diabierna 13 di juni, durante un ceremonia solem y alabes festivo na residencia di e embahador di Hulanda na Washington, DC, Ruth a keda instala formalmente como miembro y a ricibi e parafernalia di e Ordo for di señor Rudolf Bekink, e honorabel Embahador. Como cu e atardi ey e team di Hulanda a suta Spaña 5-1 den Copa Mundial 2014 na Brazil, e ambiente


berdaderamente tabata hopi festivo.

Ruth a haya reconocimiento pa su servicio resaltando y compasivo cu Big Brothers Big Sisters durante mas di 25 aña y pa su participacion cu dedicacion na UMASS International Students Hospitality Program, un programa completamente boluntario cu Ruth ta presidi awor. E programa di hospitalidad ta conecta studiantenan stranhero na University of Massachusetts na Amherst cu e famianan di e comunidad cu ta sirbi como nan anfitrión pa un aña. Big Brothers Big Sisters ta e programa di mentor hobennan mas grandi di Merca cu ta wordo sostene pa boluntario. Ruth tambe a haya reconocimiento pa su compromiso di mas di un decada cu e Martin Luther King Birthday Breakfast cu ta tuma luga tur aña pa recoge placa pa beca pa hobennan den necesidad.

Cuater aña pasa e North-

western Children's Advocacy Project a honra Ruth cu e Ellen Sedlis Award. E premio Ellen Sedlis ta "duna reconocimiento na esunnan cu ta traha den `trincheranan` di frontera, y cu a mehora bida di muchanan. Esunnan cu a inverti e miho parti di nan bida profesional of personal pa haci e trabou necesario pa yuda muchanan cura emocionalmente y pa crea un mundo caminda violencia ta un enemigo aleha. Simplemente bisa, e ta honra e esfuersonan cu no a wordo reconoce, e logronan den silencio, e compromisonan sosteni durante temponan largo". Na mes un tempo, e Gobierno di e estado Massachusetts a honra Ruth cu un citacion cu ta bisa "Na reconocimiento pa su dedicacion sobresaliente y su numeroso contribucionnan valioso durante hopi aña cu Big Brothers Big Sisters."

Despues di a gradua na 1973 di American Community School na Beirut, Lebanon, Ruth a obtene su B.A (An-



thropology) na Macalester College, St. Paul, Minnesota (1977) y su M.A (Social Work) di University of Missouri na Columbus, Missouri (1979). Ruth ta casa cu Dr. Stephen Hickman un socio pediatra di e clinica Amherst Pediatrics. Na december nan

ta celebra nan di 35 aniversario matrimonial. Nan tin dos yiu adulto, Sarah Elizabeth y Rachel. Mas di un decada pasa, ATA a nombra e pareha como Embahador di Bon Boluntad pa Aruba, mientras cu e yiunan a ricibi Distinguished Visitors Award. □